

復言真人知之耶唯唯行辭小異有疑復來問唯唯

右天怨地咎國之害微立洞極經文

太平經卷之九十一

太平經卷之九十二

訓三

三光蝕訣第一百三十三

請問天之三光何故特蝕邪善哉子之所問是天地之大怨天地戰鬪不知其驗見效於日月星辰然亦可蝕亦可不蝕咎在陰陽氣戰鬪何故戰鬪乎陰陽相新遠諍勝負夫陰與陽本當更相利祐共為和氣而反戰鬪悉過在此不和調如使和調不蝕亦當不蝕邪然大洞上古最善之時常不蝕後生彌彌共失天地意遂使陰陽稍不相愛故至於戰鬪。子以吾言不然也子使德君案行吾文盡得其意戰鬪且止小得其意小止半得其意半止如不力行固困耳請問夫日月蝕以何時運相逢邪噫子其愚哉真人正復更發天怒今真人以何知為時運邪惡生見其同處也冥冥哉子之心也其暗冥何劇也審若子言運相逢也何故於一年之間日月蝕無解矣或連歲不能運何以然帝王多行道德日月為之不蝕星辰不亂其運何以然哉又天性陰陽同處本當相愛何反相害耶又陰陽

本當轉相生轉相成功何反相賊害哉是子之愚也子欲知其實比若人矣人常相厚又相親一相得達過大喜則更相祐利相譽相明及其素相與不比也卒相逢便戰鬪大不比鬪死而已小不比小鬪可駭哉可駭哉愚生已解矣請問今日乃太陽火之精神也月乃太陰水之精神也今水火不同處自相遭逢則相滅何謂也不比邪善哉子言得其意然水火各以其道守其行皆相得乃立功成事比若五行不可無一也皆轉相生成子欲知其實也比若五藏居人腹中同一處心乃火也腎乃水也豈可為同處而日相與戰鬪相蝕邪子寧解知不乎唯唯愚生已覺矣是故和平氣至三光不復戰鬪蝕也三光不相蝕乃後始可言得天地之心矣以是為證故欲自知優劣行道德未俱觀此天證而聚眾文言同處相蝕是者但記同愛之文未深得之意也正使有神文言天乃未深見其情實也子知之耶唯唯行子已覺矣吾文出之後帝王德君思此天意勿忘此言此言所以

致得天心之文也如得天意命乃長全也不得天意亂命門也行而不稱天心亦大患也初上古以來衆聖帝王以此爲戒深記吾言結於曾心乃微言可見道可得也以付上德之君以救三光之闕蝕也唯唯行去辭小竟疑復來問之唯唯

四 萬二千國始火始氣訣第一百三十一

請問天下共日月共斗極一大部乃萬二千國中部分爲小部各一國德優者張地萬二千里其次張地廣從萬里其次九千里其次八千里其次七千里其次六千里其次五千里其次四千里其次三千里其次二千里其次千里其次五百里其次百里此乃平平之士德優劣之所張保也德劣者乃或無一平之士悉有病變令一國日月戰蝕萬二千國中軍盡蝕不斗極不明萬二千國軍盡不明不乎善哉深邪遠邪眇邪予所問也何故正問此變今怪一國有變萬二千國何嘗當復有變者邪怪之不及天師問恐終

古無以知之故問之也善哉予之所疑可謂入道矣一國有變獨一國日不明名爲蝕比近之國亦遙觀之其四遠之國固不蝕也斗極凡星不明獨失其天意者不明其四遠國不蝕今請問於何障隱而獨不明邪噫子固童蒙未開也類俗人哉今是天與地相去積遠是其矣道無德之國下邪氣其上蔽隱天三光各以其類上行使其不明比若霧中之處其三光獨不明無霧之處固大明也子欲重知之陰處獨不見月蝕陽處獨見日蝕子欲重知其審實比若今年太歲在子有德之國獨樂歲無德之國獨凶年今是俱共一國一歲共一年而其吉凶異比若人俱共一天一地其安危處異俗不同予知之邪唯唯善哉善哉今是日月運照萬二千國俱共之而其明與不明者處異也有道德之國其治清自靜而無邪故其三光獨大明也乃下邪陰氣不得上蔽之也不明者答在下共欺上邪氣俱上蔽其上也無道之國其治汙濁多奸邪自蔽隱故其三光不明矣子欲重知其審

比若翕目視日與張目視日比若善張目視日與象薄帛視日正此也寧解不邪唯唯可駭哉可駭哉子知駭是則得長生矣唯唯其且凶衰之國三光盡不明比若盲人而獨不觀三光明三光自若以其人盲獨不見之矣比若年盛者獨觀三光明年老若獨不觀三光明是其盛衰之效也悉寧解邪唯唯行去矣請問一絕訣說何等也今不審知一者何等也噫真人守文極多何故爲疑此邪今眩冥也子知守一萬事畢子何問眇哉宜思其言唯唯一者心也意也志也念此一身中之神也凡天下之事盡是所成也自古到今賢聖之化盡以是成器名以其早知學其心意志念善也守善業也愚者盡凶是也以其守學之以惡業也天地之性歧行萬物悉然故在師學之審可得也在學何道天地可按也聚衆人億萬不若事一賢也衆愚億萬但可疾凶敗耳審能守一賢身何害有身者不能還自鏡照見念反還鏡身志念遠即身疾衰枯落務志念近則身有澤凡志念所成衆多

不豫記之天下之事是也子知之邪唯唯請問旱凍盡死民困飢寒而烈而死何殺也此者皇天太陽之殺也六陽俱恨因能為害也何謂邪願聞之然六萬洞極其中大剛俱恨人久為亂惡之故殺其害於人何哉無有名字也但逢其承負之極天怒發不道人善與惡也遭違者即大凶矣子欲知其實比若人矣人大忿忿怒乃忿甲善人不避之反賊害乙丙丁今乙丙丁何過邪而逢人怒發天之怒發亦如此矣故承負之責最劇故使人死善惡不復分別也大咎在此故吾書應天教今欲一斷絕承負責也天其為過深重多害無罪人天甚憂之故教吾勸真人以書付上德之君令惡邪悞傷人斷絕而天道理子知之邪唯唯願請問天地開闢以來人或烈病而死盡或水而死盡或兵而死盡願聞其意何所犯坐哉將悉天地之際會邪承負之厄耶然古今之文多說為天地陰陽之會非也是皆承負厄也天氣中和氣怒神靈戰鬪烈病而死者天伐除之水而死者地伐除

之兵而死者人伐除也願聞烈病而死者何故為天殺天者為神主神靈之長也故使精神鬼殺人地者陰之卑水者陰之劇者也屬地陰者主懷姓凡物懷姓而傷者必為血水者水之類也懷姓而傷者必怒不悅更以其血行汙傷人水者乃地之血脉也地之陰也陰者卑怒必以其身行戰鬪殺人比若臣往捕賊必以其身行捕取之也不得若君但居其處而言也中和者人主之四時五行共治焉人當調和而行之人失道不能順念之故四時逆氣五行戰鬪故使人自相攻擊也此者皆天地中和忿忿不悅積久有病悒悒故致此善哉嚮不力問無從知之也願聞此悉承負之厄乃忿三氣其不承負之時人死云何哉然人生有終上下中各竟其天年或有得真道因能得度世去者是乃無承負之過自然之術也子知之耶唯唯行子曉哉乃一旦而相隨死者皆非命也是乃天地中和四時五行戰鬪伏殺效也善哉善哉嚮不及天師問無緣知是也故天地開闢以來常有

此厄也人皆不得知之今甚病之憂之人多無罪而死上感天天故遣吾下為其具言已行吾天文之後人民萬物且各以其壽命死無復并死之會也善哉善哉後生各得其命矣真人知之邪唯唯請問即非天道時運周而死何故常以天地際會而亂哉五行際會而戰邪五帝之神歷竟而窮困邪嚮善哉真人之難也今天且使子問邪其投辭乃入天心識其何一要訣哉吾甚嬉之今是真若子言今為子具條解之今諸真人遠來為天地具問事乃為天地開闢以來帝王問疑宜安坐聽吾辭唯唯然夫天之為法人民萬物之為數也比若四時之氣但當更相生成相傳而去比若人生少者後當老長更迭相傳而去不當乃道闢戰因絕滅世類也所以道戰水旱癘病死盡者人主由先王先人獨積稍失道心意積久至是際會即自不而自度因而滅盡矣既滅盡無餘種類夫天地人三統相須而立相形而成比若人有頭足腹身一統凶滅三統反俱毀敗若人無頭足腹有

一亡者便三凶矣故人大道大毀敗天地三統滅亡更其憤憤萬物因而亡矣夫物盡又不能卒生也由是幾何滅絕幾何更起或即復或大久大敗久乃能復也故小毀則疾復也子欲重知其審實令後世德君察知天地寬不之大效比若家人治生有畜積多者雖邇迨逢承負凶年不收也固固而自存大多畜積之家雖連年遭惡歲猶常活小有畜積之家連年不收餓而死盡常貧之家遭一年凶便盡死而自度出也因無世。天道有格法運非際會也。比若夏秋當力收冬春當坐食成事夏秋不善力收冬春當餓死滅盡古者聖人天書因此共記為際會也。真人欲知之如此矣。今太平氣至當常平不當復遭際會死亡者也。夫天帝王治故覺德君凡民為其道事要使一觀覺知如此矣。嚮使先生凡人常守要道與要德雖遭際會不死亡也。夫天帝王治國之法以有道德為大富無道德為大貧。因名為無道無德者恐不能安天地而失之也。先生稍稍共

廢絕道德積久復久乃至於更相承負後生者被其冤毒災劇悉應無道而治至於運會滅絕不能自出大咎在此子知之邪唯唯可駭哉可駭哉行復更曉真人一語夫道德與人正天之心也。比若人有心矣人心善守道則常與吉人心惡不守道則常衰凶矣。心神去則死亡矣是故要道與德絕人死亡天地亦亂毀矣。故道使天地人本同憂同事故能迭相生也。如不得同憂同事不肯迭相生也。相愛相利也。故道德連之使同命是故天地觀人有道德為善則大喜見人為惡則大怒忿忿真人豈解邪唯唯可駭哉。愚生甚畏之子知畏之則可長生無凶矣。不知畏之則天已易去子矣。宜重慎之。唯唯行復重曉真人一解。今是吉凶之行。比若道德禮義與刑罰矣。人而守其道德禮義則刑罰不起矣。失其道德禮義則刑罰興起矣。故守善道者凶路自絕不教其去而自去守凶道者言路自絕此猶若日出而星迷星出而日入不失錄分善哉善哉今曉真人一大訣言也。今世

人積愚暗昏爾傳相告語言時運周有吉凶如此言為善復何益邪為惡何傷乎哉。乃時運自然力行善復何功邪。而吉者聖人常承天心教人為善正是也。言時運而反共亂天道者是辭也。使天地常不悅喜實人行致之反言天時運自惡不肯自言惡反意天地為惡。比若人家不孝惡子不肯自言惡反言父母惡此之謂也。故天常苦忿忿悒悒。因是運會者殺之。聞之樂易其世類也。獨不但當相隨老者去少者長各以其年命窮變化。比若天地開闢以來人形變化不同是也。善哉愚生以一大解於是古今人形雖異而氣同子欲重知其審比若四時氣五行位雖不同受內同氣轉相生成。猶若人頭足不相似內反合成一人也。善哉善哉今復重曉真人一言。天積疾人為惡反常言時運凶上皇氣至當助德君治恐時人行不改易為惡行以亂正氣。毀天寶故遣吾下為德君出文以曉眾人使共常按吾文為行不復共愁天地而不犯天禁自是之後行吾天文使神助德君治犯

者誅之人不誅之神且誅之子知邪唯唯不敢犯也行辭小小竟凡書自思其要唯唯詰問天師萬二千國之策符各異意皆當於何置之各隨其國俗宜以何為始以斗極東南火氣起願聞其意訣何也火者陽也其符今

主天心和者主施開者主通明者主理凡事火者為心心者主神和者可為化首萬事將與從心起心者主正事倚仁而明復有神光萬二千國殊策一通以為文書上章天氣且自隨而流行真人自勵與之子勿逆之子喪乃天樂出書故使吾言子乃不信吾言也求信於子之身也子行之而災日降是天樂行之喜也故災除也子不行而多疾災是天忿忿悒悒子留難其道也火凶勿問於人取效於此明於日月天意所欲為子不可不慎也

勿反卒害之但當行天道以消亡之耳如是者所謂得天心意矣不如吾文言復枉急其刑罰災日多天不悅喜真人知之邪唯唯

火氣正神道訣第一百三十五

師獨使令火行正神道何也善哉子之問也是故百人百意千人千意萬人萬意用策不同各殊異故多不得天心意真人言是也今乃火氣最成上皇氣至乃凡陪古者火行太平之氣後天地開闢以來未嘗有也夫火氣感者必正神道何也願聞其意然夫火者乃是天之心也心主神心正則神當明故天使吾下理神道也夫神道已自神何必當理之邪善哉子之言夫神乃天之正吏也今邪神多則正神不得其處天神道內獨大亂俱失其居今天氣不調帝王為之愁苦而人又不得知其要意子欲樂知其口也此比若人矣今邪人多居位共亂帝王之治令使正人不得其處天地為其邪氣失正夫邪多則共害正正多則共禁止邪此二者天地自然之

術也子知之邪故令太陽最成未嘗有也陽者稱神故天為神陰者稱邪故邪氣常以陰中往來不敢正晝行而正晝行為名陰乘陽路病而晝作名為陰成與為陽失其道若夜間為是久矣故天道吾正神道也令使不敢復為也子知之邪唯唯善哉善哉

洞極上平氣無蟲重複字訣第一百三十六

請問洞極上平氣至無不治故天師乃考痘疥蟲食人也今獨以此驗之邪其餘蟲云何哉善哉真人今且問事也天疾是教子問此邪天甚疾人為惡精吏民背天逐地共欺其上獨陰伏為奸積久如蟲食人也天毒惡之故使子反覆問之然蟲食人所謂蟲而治人也其為災最甚劇逆氣亂正者也今皇平氣至不宜有此應真人付德君欲知道洞洽未今民間悉移蟲生名大小為害之屬何也謂疽癘傷疥盡從腹中三蟲之屬皆移主名其移大多者固固下多蟲治人此蟲無者下無蟲治人此少者少蟲治人善哉小生愚暗觀

此以為天性也故反應治邪子其愚何一刑  
痛也夫天地之性人為貴蟲為至賤反乃俱  
食人是為反正象賤人無道以蟲食人故天  
深見其象故使賢聖策之改其正也凡災異  
各以類見故古者聖賢得知之若不以類目  
不可思策也所以逃匿於內者象下共為奸  
而不敢見於外者陽也陽者天也君也天  
正帝王也故蟲逃於內而竊食人象無功之  
臣逃於內而竊蠶食人也可駭哉愚生其畏  
之子知畏天固是也若不畏天早已死矣真  
人慎之唯唯是故古者為治神者致其神為  
治鬼者致鬼為治物者致物為治蟲者治蟲  
為治何畏也願聞之然神者動作與天合心  
與神同意故神者天之使也天愛之鬼者動  
作避逃人所鬼倚陰中竊隱語似鬼故致鬼  
物者動作共欺其上猶若物故致物蟲者動  
作價利人共價利其上其用意雜若故致蟲  
天天變相應悉如此矣太平德君得天下上  
書文悉源其災異意以報之其正如神哉善  
哉善哉災氣已究洽矣子何以知之見天師

之正以知無復逃蟲食人故洽矣子可謂知  
道意邪請問重複之字何所主主導正導正  
開神為惡之也端及入室以為保券其為之  
云何宜可謂邪然身知而微氣此辭輕而重  
不可妄傳也精者吞之謂之神也不精者吞  
之謂之不神也不精吞之謂之妄言也故道  
者傳其人乃行凡事者傳其人乃明非其人  
謂之為妄行過還及入其人身真入知之邪  
唯唯不敢妄行誠歸付其人如是者為子言  
之以丹為字以上第一次下行將告人必使  
沐浴端精址面西面南面東面告之使其嚴  
以善酒如清水已飲隨思其字終古以為華  
身且日向正平善氣至病為其陰去面日益  
潤澤或見其字隨病所居而思之名為還精  
養形或無病人為之日益安靜或身有瘡邪  
鬼物反且變爭雖忿爭自若力思勿感也久  
久且服去矣自是之後天樂人為正直以他  
文為之天神亦助下之隨人意往來上士見  
人吞字歸思亦然當一吞字皆能教故曰天  
道一旦而行吾之為道不效辭語效立與天

道響相應和以是為神真人慎之既開天神  
道歸于德君付于賢良人立自正有益於上  
政明矣德君明師告之以威為嚴所告悉為  
為有所親見神靈慎勿道之上士因是乃至  
度世中士至於無為下士至於平乎人所得  
各有厚薄天神隨符書而命之故言勿傳其  
所思不可得不同也不同故不可相語也信  
哉易哉其為道也要哉約哉其為志壽也因  
而學之其人將自順也將自善有神明轉其  
心意使其悅也或今日吞吾字後皆能以他  
文教教十千百而相應其為道須臾之間  
乃周流八方六合之間精神隨而行治病故  
自是之後天下人畢早正易其行皆樂真文  
不復為邪偽也真人欲樂安天地道使疾正  
最以三道行書為前願聞為前言善哉子之  
問事愚者難正自若亂人洽令德君慈故授  
行書於前令使上下大小自相拾正其俗人  
無孤言辨士之善善哉善哉願聞三道行書  
文何但使一通集行書而上必使有前後文  
書眾多善哉善哉子之言中天心意所以使

有前後難問者欲使俗人深自知過也獨言之大病也不見孤辭單文之惡則無以見集行善之善不傳其誤分別其大失皆解人心乃後且可救也心不解不如其所行久大誤也人心覺則易正凡吾為文皆如此矣非獨

是也子知之邪唯唯行子已曉矣真人慎事書文已足無輕數句問欲不為子說之恐恨子意欲復為子道之今道大文又天道不可句極得其意天大喜不得其意逆天道反與天為咎不敢復數言也行去

右大集難問天地毀起日月星蝕人烈死萬二千國策符字開神訣

太平經卷之九十二

太平經卷之九十三

方藥厭固相治訣第一百三十七

訓三

今惡生得天師文書拘校諸文及方書歸居闕處分別惟思其要意有疑不能解願請問一事言之今天師拘校諸方言十治愈者

方使天神治之也十九治愈者方使地神治之十八治愈者方使人精神治之過此以下者不可用也惡生以為但得其厭固可畏者能相治也不得其厭固者不能相治也善哉真人言也得其難意然夫凡洞無極之表裏目所見耳所聞蠕動之屬悉天所生也天生之無此也因而各有神長命各屬焉此若六畜命屬人也死生但在人耳人即是六畜之司命神也是萬二千物悉皆受天地統而行一物不具即天統有不足者因使其更相治服也因復各使有尊卑君長故天道悉能相治制也得其所畏而十者治愈者即是其命所屬天也真人知之邪唯唯行子已知之矣請問一疑甚不謙順豈不言哉平行勿諱今若盜賊劫人者同服人耳豈可以為

天命君長邪善哉子之難也夫盜賊劫人者但以無義妄於枉服人耳不得常服久也一過服人即有重罪長更遂之不止也子何以言是為天命乎今若王者治服人豈當見逐索邪凡人生以王者為君長為命也真人亦寧解不今已大解善哉善哉行學者精之亦無妄難問也天且非人也唯唯有過有過不也敬慎之勿但若俗夫之人欲言便語也唯唯今惡生每語有劇過不言又無緣得知之今欲復有可問不敢卒言平行今獨萬物各有君長天地亦有君長邪噫子難問何一深妙遠劇也今自知所問不謙不及天師問之會遂不得知之也然天者以中極最高者為君長地以崑崙墟為君長日以王日為君長月以大月為君長星以中極一星為君長眾山以五嶽為君長五嶽以中極下泰山為君長百川以江海為君長有甲者以神龜為君長有鱗之屬以龍為君長飛有翼之屬以鳳凰為君長獸有毛者以麒麟為君長裸蟲者以人為君長人以帝王為君長天下若此者